



Brullas de beranu

Note de abrile, calda a s'improvisu, a pustis de un'ierru longu e prepotente chi non s'istracaiat de turmentare sa terra cun sos furores suos. E como, gràtzias a Deus, si nche fiat andadu; e sa terra dormiat tranchilla, ma fiat su sonnu fecundu de su beranu. S'intendiat s'alieno tèbidu de sos bisos suos de pitzinnu eternu; in su silèntziu s'aberiant prudentes sos frores de sas àrbores e cussos de sos padros si artziaiant a abbaidare s'ispantu chi ancora non conoschiant de sos isteddos. S'orizzonte fiat fascadu dae unu vapore de lughe, e pariat chi su nuscù e su tebiore de sa note si difundiant dae giosso, dae unu fogu chi non si bidiat, alimentadu dae linna profumada. Fiat s'annùntziu de sa nàschida de sa luna. Finas su cane de su cuile dormiat, ammurotzuladu comente unu tedile de roba groga in s'intrada de s'istalla. E dormiat su tzeracu puru, in sa pinneta, aprofitende de s'assèntzia de su mere chi fiat torrada a biddu pro si cojuare. Fiat seguru de su cane, su tzeracu, prus chi non de issu matessi. Dae cando s'animale, forte, giòvanu, lestru, bardaiat su cuile, non fiat sutzessu prus nudda de malu. E in fatis, mentres su sonnu de su tzeracu fiat opacu e profundu, cussu de su cane si podiat nàrrere lìmpidu, vègile e fintzas agitadu: pariat chi s'animale esseret ischidu de èssere solu a bardiare su bestiàmene e nde esseret intesu sa responsabilidade; ma in su matessi tempus s'istintu suo non fuiat a su podere de sa note, de s'istazione; e cada tantu una trèmula li faghiat mòvere sas costas, suta su pilu chi pariat avolutadu dae un'alenu de bentu. Assora si lamentaiat, in su sonnu, pro un'ispàsimu fisicu chi fiat puru unu praghere indefinidu, unu disàgiu chi non si podiat aferrare, comente cussos de sos pitzocheddos. E in fatis

issu puru fiat unu cane giovaneddu, chi ancora non connoschiat s'amore. Sos duos matzones, a su contràriu, mascru e fèmina, in bassu in sa gruta in ue teniant a disponimentu tantas rocas ammontadas de matas, non podiant dormire. Teniant fàmene, indebilitados dae cussas ùrtimas dies de abba e de carestia; e s'istògomo bòidu rafinaiat sa fantasia issoro comente su diunu esaltaiat s'eremita solitariu. Su matzone intendiat su cambiamentu de su tempus e chi fiat arribadu su tempus de sa giustìzia. Ca si Deus l'aiat batidu a su mundu, dende.li cun generosidade de babbu cosas meda pro si fàghere bàlere, tocaiat puru chi s'esseret agiuadu. Duncas nche fiat essidu a foras, e sa cumpàngia luego in fatu: fiat piticheddu e giai nieddu, cun una coa prus longa e prus russa de su corpus matessi: sos ogros lughiant comente sos isteddos. Su matzone fèmina fiat prus manna, brunda, lissia: longa longa, resurtaiat a si fàghere pitica comente unu assile de niu. Poniat in fatu a su cumpàngiu sena una voluntade pretzisa, istorchende.lu in sa manera de camminare, est a nàrrere ponende sos pees de segus in s'ormina de cussos de in antis, a manera chi s'ormina, si sa coa non resurtaiat a nde la cantzellare de su totu, pariat de un'animale cun duos pees ebbia. Calant finas a su riu, in suta su monte, e iscurtant. S'abba fiat meda e colaiat in mesu de sos giuncos de su riu, borbotende comente in protesta: in cussu logu b'aiat nuscus de menta. Su matzone mascru aiat bufadu, prus che àteru pro tastare s'abba; a pustis si fùrriat e torrende in segus comintzat a iscùdere sa coa in sa currente, finas a si l'infùndere tota, comente faghent sas fèminas cando si sàbunant sos pilos longos. Su matzone fèmina ischiat giai ite cheriat fàghere su cumpàngiu; e cando issu si torrat a pònnere in biàgiu, a cara a su monte e a pustis peri sos campos, li ponet in fatu istende atenta a mundare su terrinu cun sa coa sua assuta. De su restu s'erba si bufaiat sos sàrties issoro, e su lentore sabunaiat s'erba. Totu lis fiat andende bene. Imbàtidos a s'oru de su logu in ue bi fiat su cuile, su matzone mascru si firmat: si firmat fintzas sa fèmina e si ponent torra a iscurtare. S'ispricu de su silèntziu lùghidu de sa note non fiat segadu dae

peruna fresada: fintzas sos isteddos fiant firmos comente pipias de ogros incantados; faeddaiant ebbia, comente chi s’esserent narende unu segretu pari pari, sos nuscas de sa vegetazione: s’erba de martzu e fustigu; erba de fenu e ranunculu furisteri: fintzas su matzone teniat fragu de menta. E ischiat bene meda ite depiat fàghere. Lassende su cumpàngiu firmu in mesu de su ruu, curret sola a cara a dae in antis cun agilitade ispantosa. Intendiat unu turbamentu de bolu, unu sensu de libertade, de pitzinnia, gai de innotzèntzia. Teniat gana de cùrrere e de giogare: nudda àteru. Fintzas su fàmene nche fiat isparidu dae sas intragnas suas prenas de gosu. E sigomente non teniat intentzione peruna de furare, ma de si divèrtere ebbia e de agatare pro sos giogos suos unu cumpàngiu prus pagu famidu e criminale de su cumpàngiu minetosu suo, s’acostat a su cuile cun sa trancuillidade de un’amigu de domo. Su cane l’intendet: e intendet su chi issa cheret. Duncas no apeddat, si nde pesat a s’improvisu, nche li sàrtiat a subra, l’aferrat a su tzugru, sena la mossigare, issa puru fùrriat lestra sa conca e li mòssigat, unu pagu prus a forte de cantu aiat fatu issu, sa punta de un’origra. Su cane si trèmulat totu, comente brusiadu: dae s’ischina li partint peri totu su carenadu sos fogos de custu istriore buddidu: s’iscàgiant in ischintiddas de praghere. Intendet issu puru unu disìgiu macu de giogare, de si liberare dae s’iscraitùdine a s’òmine, a sos animales, a su modu de vivere inùtile suo. Lassat su matzone ma lu torrat a leare luego, s’imbòligant in s’erba, si mòssigant finas a si bogare sàmbene, semper in silèntziu, cun gosu crudele. Posca, a s’improvisu, issa si fuit, paret chi si nche isparit in sa fine de s’orizzonte. Ma su cane biet in s’erba comente un’ormina de lughe, e andat in fatu, ammachiadu de praghere. Su matzone l’isetaiat in su giassu in ue s’erba faghiat comente una lìnia de cunfine subra de unu bòidu asulu chi pariat unu frùmene, cun sa vela groga de sa luna noa: si nche imbolat contra a issu, tentende de nche li sartiare a subra: su cane si pesat reu; si pesat reu issu puru e paret chi s’abratzent: a pustis si aterrant pari pari e torrant a si ammurotzulare in s’oru de su monte, cun unu giogu durche e

crudele a su matessi tempus. Su matzone mascru, in tantis, intrat trancuillu in su cungiadu de su bestiàmene; ma lassat in pasu sas berbeghes dormidas, ancora totu unfradas dae s'ispuma cheghente de sa lana issoro, e cun su murre chircat sos porcheddos de una sue corcada cun issos in unu chigione de s'istalla. Sa mama chircat de los defensare: ma su matzone nche li iscudet a ogros su prùere de su ludu chi portaiat in sa coa, e sa bèstia nche ruet atzegada. Assora s'inimigu nde leat sos porcheddos, afundat in sas gulas issoro sas dentes suas de atzàrgiu, e unu in fatu de s'àteru si nche nde leat chimbe, tragende.nche.los peri su sartu e a pustis a cara a giosso fintzas a sas rocas. E in cue, sentza àteru, at cumintzadu a si nche los mandigare, finas a cando imbatet sa cumpàngia bramosa chi si nche màndigat unu porcheddu intreu, boghende.nde.lu dae sa pedde modde, comente una fruta dae sa còrgia. A su fàghere de sa die su tzeracu s'acatat de su bòidu in s'istalla: ma bidende chi su cane no aiat apeddadu e chi fiat ancora dormidu trancuillu comente chi in tota sa note esseret fatu su dovere suo, pensat issu puru calmu e cussentziosu: - Pòbera bèstia, sa limba t'ant presu; ammajadu t'ant sos furùnculos cun paràulas de maja. Ite culpa nde tenes tue? E mancu deo nde tèngio culpa. E su mere no at a nàrrere nudda, ca a issu puru l'ant presu sas paràulas ammajadoras de una fèmina: e presu bene, issu, pro sa vida. E si incurbat, rassignadu e sena lu chèrrere brullanu, a dae in antis de su podere de sas cosas chi non si podent iscampare. Una die, però, a pustis de tempus, inghiriende in sos logos a faca, imbatet a sa tana de sos matzones e in unu chigioneddu biet duos catzeddos curioseddos chi giogaiant cuntentos a si pònneru in fatu e a si mossigare; e non solu non si nche fuint ma paret chi lu conoschent. Fiant duos esemplares bellos meda de sa ratza de canes chi si narat "*volpini*", de cussos chi non si lassant ingannare dae su matzone e sunt sos prus adatos a lu catziare.